

दिनांक 04.01.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- प्रधानमंत्री नरेन्द्र मोदी गांवाई हलकां री जनता ने मान री जिंदगी देवण री सरकार री प्राथमिकता दोहराई-नई दिल्ली मांय ग्रामीण भारत महोत्सव रो उद्घाटन कीनो।
- जल शक्ति मंत्री सी.आर. पाटिल डूंगरपुर जिला रा खड़गदा मांय मोरन नदी हलका मांय पाणी बचावण रा काम देख्या- मुख्यमंत्री भजनलाल शर्मा डूंगरपुर मांय शिल्पग्राम बणावण रो ऐलाण कीनो।
- अजमेर मांय चाल रह्या ख्वाजा साहब रा सालाना उर्स मांय आज प्रधानमंत्री नरेन्द्र मोदी री ओर ऊं चादर पेश करी ज्यी।
- राज्य सरकार जनजाति हलकां मांय माइनर खनिजां री नीलामी मांय स्थानीय रेहवासियां री भागीदारी बधावण सारु अमानत राशि घटा र पांच लाख रुपया कीनी।

000

प्रधानमंत्री नरेन्द्र मोदी गांवां ने विकास अर मौकां रा केन्द्रां मांय बदल र देश रा गांवाई हलकां ने मजबूत बणावण री सरकार री सोच माथे जोर दीनो है। वे आज नई दिल्ली मांय ग्रामीण भारत महोत्सव रा उद्घाटन रे मौके बोल रह्या हा। प्रधानमंत्री कह्यो के गांवां रा लोगां ने मजबूत बणावण माथे वां री सरकार खास ध्यान दे रही है।

.....

प्रधानमंत्री कह्यो के वां री सरकार रा इरादां, नीतियां अर फैसलां ऊं देश रा गांवाई हलकां मांय नुवी ऊर्जा आ रही है। वे कह्यो के केन्द्रीय मंत्रिमंडल प्रधानमंत्री फसल बीमा योजना ने 2025-26 तांई चलावण री मंजूरी दीनी है। श्री मोदी कह्यो के प्रधानमंत्री किसान सम्मान निधि रा तैत हाल तांई तीन लाख करोड़ रुपया री माली मदद दी जा चुकी है।

.....

श्री मोदी कह्यो के स्वच्छ भारत अभियान, प्रधानमंत्री आवास योजना अर जल-जीवन मिशन समेत सरकार री न्यारी-न्यारी कोशिशों रो मकसद गांवाई हलकां रो विकास करणो है। 9 जनवरी तांई चालण वाळां ग्रामीण भारत महोत्सव रो मुद्दो है- **विकसित भारत 2047 के लिए आत्मनिर्भर ग्रामीण भारत का निर्माण और सिद्धांत-गांव बढ़े तो देश बढ़े।**

000

केन्द्रीय जल शक्ति मंत्री सी.आर. पाटिल आज डूंगरपुर जिला रा खड़गदा रा मोरन नदी हलका मांय पाणी बचावण रा काम देख्या। वे कह्यो के राजस्थान री 11 नदियां ने जोड़ र प्रदेश ने हर्यो-भर्यो बणायो जावेला। ई मौके वे कह्यो के प्रधानमंत्री नरेन्द्र मोदी पाणी बचावण रा काम मांय जनभागीदारी सारु कह्यो हो, जिण ने डूंगरपुर री जनता सांची कर बतायो।

.....

कार्यक्रम मांय मुख्यमंत्री भजनलाल शर्मा मोरन नदी ने बचावण सारू खड़गदा री जनता री कोशिशों री सराहवणा कीनी। श्री शर्मा डूंगरपुर मांय कराया जा रह्या विकास रा कामां रो जिकर करता थकां कह्यो के डूंगरपुर मांय 44 करोड़ रुपया रा खर्च ऊं शिल्पग्राम बणायो जावेला।

000

चिकित्सा मंत्री गजेन्द्र सिंह खींवर आज जयपुर मांय वां रा सरकारी रेहवास माथे जनता री समस्यावां सुणी अर वां रा बेगा निपटारा सारू अहलकारां ने ज़रूरी हुकम दीना। ई मौके वे कह्यो के विभाग मांय करीब 21 हजार ओहदां माथे नौकरियां दीरीजी है अर और नौकरियां देवण सारू कार्यवाही करी जा रही है।

000

अजमेर मांय चाल रह्या ख्वाजा साहब रा 813 वां उर्स मांय आज प्रधानमंत्री नरेन्द्र मोदी री ओर ऊं चादर पेश करी ज्यो। केन्द्रीय अल्पसंख्यक कार्यमंत्री किरन रिजिजू चादर चढ़ा र देश मांय अमन चैन अर भाईचारा री दुआ मांगी। ई मौके वे बुलंद दरवाजा ऊं प्रधानमंत्री रो संदेश बांच्यो। प्रधानमंत्री वां रा संदेश मांय उर्स मांय शामिल रहे रह्या जायरीन ने शुभकामनावां देता थकां कह्यो के ख्वाजा साहब कानी ऊं दिया ज्यो जनता रा भला अर इंसानियत ऊं जुड़्या संदेश जनता रा मन मांय अमिट छाप छोड़ी है अर वां रा प्रति दुनिया भर मांय आस्था है। प्रधानमंत्री कह्यो के ख्वाजा साहब रा सालाना उर्स रो उत्सव लोगां रा आपसी जुड़ाव ने मजबूत बणावण मांय मोटी भूमिका निभावेला। ई पाछे श्री रिजिजू मौजूद लोगां ने सम्बोधित करता थकां कह्यो के अब बगत आ ग्यो है, जद भारत रो पूरो समाज एकजुट रहे र दुनिया मांय शांति सारू काम करेला।

.....

श्री रिजिजू दरगाह रो वेब पोर्टल अर जायरीन सारू गरीब नवाज़ एप लॉच किनो।

.....

ई मौके केन्द्रीय मंत्री भागीरथ चौधरी, भाजपा रा अल्पसंख्यक प्रकोष्ठ रा राष्ट्रीय अध्यक्ष जमाल सिद्दीकी, अल्पसंख्यक मामलात मंत्रालय रा सचिव डॉ. चन्द्रशेखर कुमार अर संयुक्त सचिव श्रेया सीशाइक मोहीदीन ई मौजूद हा।

000

राज्य सरकार प्रदेश री नुवी खनिज नीति अर नुवी एमसेण्ड नीति रा प्रावधानां रे मुजब राजस्थान अप्रधान खनिज रियायत नियम, 2017 मांय ज़रूरी बदलाव री अधिसूचना जारी कर दीनी है। खान विभाग रा प्रमुख शासन सचिव टी. रविकान्त आ जाणकारी दीनी। वे बतायो के बजरी खनन सारू हलका री मंजूरी ऊं पैली पर्यावरण ऊं जुड़ी मंजूरी लेवणी रहेला। जनजाति हलका मांय अप्रधान खनिज ऊं जुड़ी नीलामी मांय स्थानीय रेहवासियां री भागीदारी सारू अमानत री रकम 10 लाख ऊं घटा र 5 लाख रुपया कर दीरीजी है।

000

राज्य मांय 15 मार्च पाछे अध्यापकां रा तबादला माथे विचार कर्यो जावेला। शिक्षा अर पंचायती राज मंत्री मदन दिलावर आज बालोतरा मांय खबरनवीसां ने आ जाणकारी दीनी। वे कह्यो के परीक्षा बीचे, शिक्षकां रा तबादला विद्यार्थियां रा हित मांय नी है। इण ऊं पैली श्री दिलावर भटियाणी माता मिन्दर मांय पूजा अर्चना कर र प्रदेश मांय सुख-समृद्धि री कामना कीनी।

000

राजसमंद मांय प्रधानमंत्री जीवन ज्योति बीमा योजना ऊं बत्ता ऊं बत्ता लोगां ने जोड़बा सारू जिला कलेक्टर बालमुकुंद असावा री पहल परां मिशन कुटुम्ब कवच चलायी ज्यो है। म्हाणा खबरनवीस बतायो के ई मिशन रा तैत महज़ 9 दिन मांय 58 हजार जणा बीमा सारू अर्जी दीनी है।

000

वरिष्ठ नागरिक तीर्थ यात्रा योजना रा तैत उदयपुर रा राणा प्रताप नगर रेलवे स्टेशन ऊं कामाख्या सारु खास रेलगाड़ी रवाना व्ही। इण मांय उदयपुर रा 92, राजसमन्द रा 11, प्रतापगढ़ रा 15, चित्तौड़गढ़ रा 36, सलूंबर रा 5, झूंगरपुर रा 33 अर बांसवाड़ा रा 39 बुजुर्ग शामिल है। रेलगाड़ी मांय अजमेर अर जयपुर स्टेशन ऊं ई वरिष्ठ नागरिक सवार व्हा।

000

दृष्टि बाधित लोगां सारु ब्रेल लिपि री सरुआत करण वाळा लुई ब्रेल ने आज वां री **जयंती** रे मौके सिरधाभाव सागे याद कर्या जा रह्या है। ई मौके हनुमानगढ़ जंक्शन रा मूक बधिर अर अंध विद्यालय मांय खास सभा राख्यी ज्यी। सभा मांय लुई ब्रेल रा व्यक्तित्व अर काम रा बारा मांय विचार करी ज्यो।

000